



Акафист

святому Симону, Юрьевецкому чудотворцу

Кондак 1

Избранный чудотворче и преславный
угодниче Христов, подвигом юродства во граде
Юрьевце подвизавыйся и живущия в нем еще в
житии твоём преславными чудесы и знаменьями
удививый, святыи праведный блаженный
Симоне. Мы же, недостойнии, прославляющаго
тя славы Господа и совершающе святую память
твою, благодарственное возглашаем тебе пение.
Ты же, яко имеяи дерзновение ко Господу, моли
избавитися нам от всяких бед и напастей, да в
радости зовем ти:

Радуйся, Симоне блаженне, Юрьевский
чудотворче.

Икос 1

Ангельскаго жития на земли, и в Царствии
Небеснем со святыми, вселения желая, блаженне
Симоне, потщался еси от юности твоея
подвигами поста и молитвы и творением добрых
дел Богу единому точию, а не миру работати, и

всегда имея сокрушения о гресех своих. Мы же, многогрешнии, не имущии таковых дел благотворения, дерзаем воспети тя и удивляющися житию твоему во умилении зовем ти:

Радуйся, от юности твоя Бога единого всею душею твоею возлюбивый.

Радуйся, страх Божий от юности твоя в сердце своем стяжавый.

Радуйся, всегда в молитве утешение духовное обретавый.

Радуйся, яко всегда попечение о спасении души твоя имевый.

Радуйся, яко сие в дому родителей живый, всегда к храму Божию притекавый.

Радуйся, яко тамо словесем божественных песнопений и поучением иереев, яко словесем Самого Господа внимавай.

Радуйся, Симоне блаженне, Юрьевский чудотворче.

Кондак 2

Видящи благочестивии родители твои Родион и Мария добродетельное твое житие, блаженне, восхотящи сопрящи тя браку. Ты же совет их отвергг еси и, вся яко имати вместив, удалился еси в дебри лесная да един единому Богу работаеши и поеши Ему: Аллилуиа.

Икос 2

Разумев суету мира сего и имый попечение, еже угодити Богови, во уединении со пророком Давидом Богу взывал еси: «Удалихся бегая и водворихся в пустыни, возжада душе моя к Тебе, Боже, егда прииду и явлюся лицу Божию», всегда имея покров небо и одр землю, терпя мраз зимний и летний зной, глад и жажду, былием тамо растущим питаюся. Пустынные подвиги и труды твоя кто исповестъ, юже точию ведома единому Богу: мы же прославляюще уединенное житие твое во удивлении зовем ти:

Радуйся, якоже мир сей и вся в нем возненавидел еси.

Радуйся, крест Христов на рамена своя взял еси.

Радуйся, терпением и труды твоими демонов посрамивый.

Радуйся, яко слезными воздыханьми твоими лесная дебри оглашал еси.

Радуйся, яко в уединенном житии твоём великим пророком Илии и Иоанну Крестителю подражал еси.

Радуйся, Симоне блаженне, Юрьевский чудотворче.

Кондак 3

Сила и благодать Божия осеняше и укрепляше тя, святыи праведный Симоне, егда

в дебри лесныя уклонился еси, с места бо на место преходя, обретен был еси жителями Елнати, яже, видящи тя, восхвалиша Бога, явившаго им угодника Своего, благодарственною песнию: Аллилуиа.

Икос 3

Имуще любовь ко ближнему и видяще злострадание твое во уединеннем житии твоём, Симоне блаженне, люди обретшии тя, взяша с собою в весь свою, нарицаемую Елнать, и приведоша тя к иерею, тамо сущему. Ты же, угодниче Божий, повинуюся Промыслу Божию и помня словеса Самаго Господа, реченныя во Евангелии: «Хотяй большой быти, да будет всем раб», неленостно работал еси у иереа Божия лет пятнадцать, всегда имея во устех своих молитву. Людие же, видяще таковое житие твое, начаша восхваляти тя сице:

Радуйся, кротости и послушания образе.

Радуйся, молитвы благоуханное кадило.

Радуйся, яко в мире живый, подвигами поста и молитвы древним пустынным отцем, в посте просиявшим, подражати тщавыйся.

Радуйся, тщеславие из сердца своего подвигом смирения искоренивый.

Радуйся, разум твой пред Господем смириый.

Радуйся, плоть твою духови покоривый.

Радуйся, Симоне блаженне, Юрьевский чудотворче.

Кондак 4

Бурю тщеславных помышлений от себе отгоняя и не желаем восхваляем быти, имея во уме словеса апостола Павла: «Буии Божии премудрее человек есть», удалися еси блаженне во град Юрьевец, идеже, яко незнаем, подвиг юродства нося восприял еси, поя Богу: Аллилуиа.

Икос 4

Увидевше людие града Юрьевца по пришествии твоем, блаженне, и видяци житие твое, абие убо диаволом наущаеми, яко безумна тя нарицаху и многа озлобления тебе творяху, друзии же удивляющесе незлобию и терпению твоему, ублажаху тя сице:

Радуйся, житию древних отцев Симеона и Андреа подвигом юродства Богу угодивших, елико мощно подражати тцавыйся.

Радуйся, подвигом поста, молитвы, терпения и незлобия тем подражавый.

Радуйся, в молитве первомученику Стефану уподобивыйся.

Радуйся, за творивших ти обиды и озлобления моливыйся, яко за благодетельцев.

Радуйся, в терпении твоем козни демонския победивый.

Радуйся, Симоне блаженне, Юрьевский чудотворче.

Кондак 5

Боготечней звезде подобни быша подвиги твоя, праведный Симоне: днем бо по граду ходя и яко юрод творяся, нощию же удаляся в обитель Богоявления Господня, идеже в паперти церковней, без сна пребывая и слезы от очес испущая, о прощении своих согрешений, а наипаче о творящих ти обиды и озлобления молился еси, в сокрушении сердечнем поя Богу: Аллилуиа.

Икос 5

Видя Господь подвиги и труды твоя, Симоне блаженне, даром прозрения и чудотворений еще в житии твоём обогати тя, аще подвигом юродства не желаем восхваляем быти, скрыти тщался еси. Мы же, недостойнии, удивляющесе смирению твоему, ублажаем подвиги и труды твоя и вопием ти сице:

Радуйся, в пице и питии воздержание велие имевый.

Радуйся, сими словесы: «Симоне, Симоне, ты еси глупец, несытая гортань», сам себе укоривый.

Радуйся, яко добродетельными подвиги и страданиями жизни с Царем Небесным

примиривайся.

Радуйся, подвигом смирения гордость из сердца своего искоренивай.

Радуйся, яко овогда в корчмы входяй и тамо винопийцев в воздержании утвердити тщавыйся.

Радуйся, яко многожды от них биен бывый и в сокрушении сердца своего о них Богу моливыйся.

Радуйся, Симоне блаженне, Юрьевский чудотворче.

Кондак 6

Проповедником чудес и исцелений явися иерей градский Алипий, иже удавление костное пострада и ктому глаголати не могый, притече к корчме. Ты же, блаженне Симоне, духом провидя болезнь и, обеима рукама твоима выю его обвив, исцеление тому даровал еси и научил еси пети чудодеющему Богу: Аллилуиа.

Икос 6

Возсиял еси, яко солнце пресветлое граду Юрьевцу и всей стране Российстей святостию жития твоего, лучами чудес и исцелений мглу греховную изгоняя из сердец всех притекающих к тебе, блаженне Симоне, и вопиющих сице:

Радуйся, яко терпением твоим вся нанесенныя нам оскорбления во смирении и

благодарении претерпевати нас научаеши.

Радуйся, яко незлобием твоим злобу и ненависть к ближнему из сердец наших искореняеши.

Радуйся, яко за обидящих и ненавидящих молиться подвизаеши.

Радуйся, яко подвиги твоя и нас добродетели не в тщеславии, но во смирении научиши тщитися.

Радуйся, яко воздержанием твоим и нас от греха и страстей воздержатися научаеши.

Радуйся, яко слез твоих теченьми и нас в молитве не точию благих мира сего искати, но и сокрушения о гресех своих имети наставляеши.

Радуйся, Симоне блаженне, Юрьевский чудотворче.

Кондак 7

Хотя люди согрешившия к покаянию обратити, в сокрушении сердца своего о прощении их согрешений к Богу молился еси, Симоне блаженне, святостию жития твоего всех научая купно с тобою пети Ему: Аллилуиа.

Икос 7

Новый Иеремиа граду Юрьевцу явился еси: якоже бо он плач о Иерусалиме творяще, тако и ты, блаженне, умныма очесы провидя наказание Божие за грехи людския, к покаянию вся

призывал еси, плача и соболезнуя о граде своем, но не мнози вняша стенанием твоим и исправиша житие свое. Мы же, многогрешнии, удивляющиеся прозорливству твоему, восхваляем тя сице:

Радуйся, воеводе смерть жены его Акилины и запаление града Юрьевца предсказавый.

Радуйся, во время запаления града, пред образом Богоматере за люди, согрешающия Богу, усердно моливыйся.

Радуйся, теплыми твоими молитвами бурю огненную во граде укротивый.

Радуйся, яко купцу Лонгину ты благополучие в торговых делах его и сожжение дома его предсказал еси.

Радуйся, яко ты молитвами твоими посадника Иосифа от потопления спасл еси.

Радуйся, яко ты благодарным быти за благодеяния Божия того научил еси.

Радуйся, Симоне блаженне, Юрьевский чудотворче.

Кондак 8

Странное и преславное чудо видется всем притекающим к тебе, святыи праведный блаженне Симоне, яко и вода от изрытых тобою кладенцев, черпемая с верою, телесныя и душевныя недуги исцеляет, нас же научаеши с

благодарностию чудодеющему Богу пети:
Аллилуиа.

Икос 8

Весь еси воистинну о всех молитвенник и предстатель теплейший к Богу явился еси и имый дар прозрения. Дети, яже имут жити, на руке свои принимал еси, а тех, яже имут преставитися от жизни сия, лице твое отвращал еси. Мы же, недостойнии, удивляющесе дивному промыслению Божию, восхваляем тя, блаженне Симоне, сице:

Радуйся, блаженне, яко в жизни сей не на своя силы, но на Промысл Божий надеятися нас научаеши.

Радуйся, яко молитвами твоими скорбь родителей о умерших чадах утоляеши.

Радуйся, еще сый в житии твоём воды речныя, яко по суху проходити сподобился еси.

Радуйся, яко о хождении твоём по реце Волге жителю града Юрьевца Петру даже до кончины твоея никому же поведати запретивый.

Радуйся, святче Божий, на молитву обонпол реки Волги удаливыйся

Радуйся, яко тамо лет через четыредесят по преставлении твоём устроение обители иноческаго предсказавый.

Радуйся, Симоне блаженне, Юрьевский чудотворче.

Кондак 9

Вси люди града Юрьевца удивляхуся многотерпеливому житии твоему, Симоне досточудне. Ты же, предвидя близость преставления твоего от жизни сея, усилил еси пост и покаяние, слез источники от очес твоих изливая и непрестанными воздыханьми из глубины сердечныя вопия Богу: Аллилуиа.

Икос 9

Витии многовещаннии недоумевают, како восхвалити дивныя подвиги и труды твоя, яже от юности даже до преставления твоего совершил еси, блаженне Симоне. Единощи по обычаю своему в дом воеводы градскаго Феодора и яко юрод творяся избиение велие от него самаго и слуг его приял еси, и в сих злостраданиих, причастившись Святыя Таин Христовых, блаженную твою душу Господу предал еси. Воевода же, видя святое преставление твое, умилися сердцем и раскаяся о содеянном, вопия к тебе сице:

Радуйся, блаженне, в преставлении твоем все упование твое на Бога и Пречистую Богородицу возложивый.

Радуйся, в преставлении твоем предстательством Тоя мытарств воздушных духов не убоявыйся.

Радуйся, возлюбившему тя Господу душу

твою предавай.

Радуйся, от иконы твоея благоухание источай.

Радуйся, на погребение твое множество народа собравый.

Радуйся, местом вечнаго упокоения обитель Божоявления Господня избравый и дивныя чудеса по преставлении твоем совершивый.

Радуйся, Симоне блаженне, Юрьевский чудотворче.

Кондак 10

Спасти хотя душу и сокрушения имый о гресе своем воевода Феодор множество сребра нищим и вдовицам истоци во время погребения твоего святе, повелевая молитися о прощении содеяннаго им греха и о упокоении души твоея, блаженне Симоне. Сребро же благодатию Божиею и твоими молитвами не истощися. Люди же купно с воеводою, видяще таковое чудо, восхвалиша Бога: Аллилуиа.

Икос 10

Стена и заступление граду Юрьеву и всем людем страны Российстей, восхваляющим чудеса твоя, по преставлении твоем тобою совершаемая, явился еси, блаженне Симоне: темже и нас в добродетели убогих посети и научи вопити тебе сице:

Радуйся, Соломонии от двухлетнего недуга и расслабленному земледельцу Георгию явлением твоим исцеление даровавший.

Радуйся, от Иулиании болезнь очес прикосновением к иконе твоей исцеливший.

Радуйся, яко по преставлении твоём пред запалением града Юрьевца в праздник иконы Смоленския Богоматере во многих местах виден был еси.

Радуйся, яко в храме пред Владимирскою иконою Богоматери о спасении града молился еси.

Радуйся, яко не до конца молитвами твоими граду Юрьевцу сгорети за грехи людския у Господа испросил еси.

Радуйся, якоже трижды древоделателя Иоанна от болезни его исцелил еси и от потопления того спасл еси.

Радуйся, Симоне блаженне, Юрьевский чудотворче.

Кондак 11

Пение похвальное приими от нас, Симоне блаженне, ко иконе твоей припадающих и любезно целующих ю. Недоумеваем бо, како восхваляти преславную память твою точию дивному во святых Своих Богу, из глубины сердечней вопием ангельскую песнь: Аллилуиа.

Икос 11

Светозарней звезде, на тверди небесней сияющей, подобен был еси, Симоне блаженне, с небесе всем требующим твоего многомогнотаго предстательства и заступления руку помощи простирая, скорбящия утешая и на помощь Божию уповати научая, омраченныя грехми просвещая добродетельми и строгостию жития твоего, недугующия исцеляя, с верою притекающия ко святей иконе твоей, непрестанно вопиющия ти сице:

Радуйся, яко предстоиши Престолу Господа славы и со всеми святыми Того славословиши.

Радуйся, яко о граде твоем и о всем роде христианством благодатьню Его умоляеши.

Радуйся, на небесех от ликов ангельских, яко ангел на земли поживый прославляемый.

Радуйся, яко ты на земли Всероссийским Патриарсем Иоасафом к лику святых сопричтен был еси.

Радуйся, прославление твое от земных соотечественник твоих, яко дар любви и благодарения приемый.

Радуйся, молитвами твоими во всех скорбех и озлоблениих нам помогай.

Радуйся, Симоне блаженне, Юрьевский чудотворче.

Кондак 12

Благодать чудес и исцелений, данную ти от Бога, ведуще и уповающе на силу молитв твоих, блаженне, мы, недостойнии, сошедшеся во святыи храм, прославляем память твою и, с любовью лобзающе святую икону твою, восхваляем дивнаго во святых Своих Бога, непрестанно поюще Ему: Аллилуиа.

Икос 12

Поюще твоя преславная чудеса и исцеления, и до днесь тобою являемии всем с верою и любовью к тебе притекающим и имущим твоего многомогущаго предстательства и заступления, хвалим тя вси, яко сосуд благодати, неоскудно точащий любовь и милосердие к роду человеческому. Ты бо, о Симоне преблаженне, подвигом юродства и вольныя нищеты твоея, козни диавола на земли победил еси, и терпением и незлобием твоим, яко некою небовосходною лестницею, невозбранно на небеса возшел еси отонудуже и нас грешных, чающих твоея помощи и заступления, посети милосердием твоим и научи вопити тебе сице:

Радуйся, в житии твоем граду непоколебиму подобен бывый, иже не може укрытися верху горы стояй.

Радуйся, яко подвизи и труды твоя подобны быша светильнику горящему, иже не может под

спудом сокровен быти.

Радуйся, и по преставлении твоём явленными твоими болящия исцеляяй.

Радуйся, чудесы твоими, яко солнце незаходимое всей стране Российской сияяй.

Радуйся, всемогущий ходатай спасения нашего.

Радуйся, неусыпный о душах наших молитвениче.

Радуйся, Симоне блаженне, Юрьевский чудотворче.

Кондак 13

О преславный угодниче Божий, святой праведный блаженне Симоне! Приими сие малое, аще и от недостойных устен приносимое тебе моление, и умоли Господа Бога, всея твари Содетеля, избавитися нам в жизни сей от всяких бед и напастей, христианския кончины сподобитися, да и по преставлении нашем твоим всемогущим предстательством спасаемии от воздушных мытарств, купно с тобою воспоем Богу: Аллилуиа.

Этот кондак читается трижды, затем икос 1-й и кондак 1-й

